

四庫全書

史部

欽定四庫全書

史部

欽定續文獻通考卷一百七十三至一百七十六

給事中_臣劉芬覆勘

總校官內閣中書_臣孫溶

欽定四庫全書

欽定續文獻通考卷一百七十三

經籍考

臣等謹案馬端臨經籍考子類凡二十門蓋本諸
列史藝文志而列史又本劉向輯錄者也顧如名
家墨家縱橫家後世鮮有專書即馬氏所收每門
亦自無幾今從四庫全書之例闕之餘皆依類詮
次惟譜錄一門馬氏所無其序農家引宋三朝藝

文志謂殖物寶貨著譜錄者亦佐助衣食之源故
咸見于此然酒經蟹譜悉入農家似于體例究為
未協况宋以來著譜錄者取類尤繁勢難比附今
亦從四庫全書之例增入此門列于農家之後共
一十有八門曰儒家曰道家曰法家曰雜家曰小
說家曰農家曰譜錄曰天文曰推算曰五行曰占
筮曰形法曰兵家曰醫家曰神仙家曰釋家曰類
書曰雜藝術用便觀覽竇採擇焉

子 儒家上

宋史藝文志儒家類一百六十九部一千二百三十四卷

遼金元三史不立藝文志散見各紀傳中

明史藝文志儒家類一百四十部一千二百三十卷

宋

王開祖儒志編一卷

開祖字景山永嘉人皇祐進士試秘書省校書郎佐

處州麗水縣後退居郡城之東山設塾授徒為東嘉道學倡郡守楊蟠立儒志坊表之

楊蟠序略曰景山舉進士以所如不合退與其徒講學所著僅存此編其言曰孟子以來道學不明吾欲述堯舜之道論文武之治杜邪淫之路開皇極之門非有所見而能為是言哉

臣等謹案編中有曰復者性之宅无妄者誠之源學離性而言情奚情之不惡時濂洛諸儒未作乃

能發明經蘊見及于此温州理學之淵實有以開
金華慶元之先者也

張子全書十四卷附錄一卷

張子字子厚其先大梁人父迪以殿中丞知涪州早
卒遂不能歸僑寓郿縣登進士調雲巖令以呂公著
薦授崇文院校書與王安石不合引疾歸復以呂大
防薦詔知太常禮院又與有司議禮不合仍引歸道
卒嘉定十三年賜諡曰明淳祐元年封郿伯從祀孔

廟事蹟見宋史道學傳

楊時二程粹言二卷

時字中立南劍州將樂人熙寧進士累官國子祭酒
高宗即位除工部侍郎兼侍讀以龍圖閣直學士提
舉洞霄宮卒謚文靖

李邦獻省心雜言一卷

邦獻懷州人官至直敷文閣

朱子刪定曾恬胡安國所編上蔡語錄三卷

朱子見史類恬字天隱溫陵人安國見經類

臣等謹案是書乃恬與安國所錄謝良佐語而朱

子刪定之者也良佐字顯遵上蔡人登進士第建
中靖國初官京師召對忤旨出監西京竹木場復
坐事廢為民事蹟見宋史道學傳

朱子延平答問一卷附錄一卷

臣等謹案朱子於高宗紹興二十三年將赴同安
主簿任往見李侗于延平始從受學紹興三十年

冬同安任滿再見侗僅留月餘又閱四載而侗沒
計前後相從不過數月故書札往來問答為多後
朱子輯而錄之又載其與劉平甫二條以成是書
朱子門人又取朱子平昔論延平語及祭文行狀
別為一卷題曰附錄明非朱子原本所有也侗字
愿中劔浦人事蹟見宋史道學傳

朱子雜學辨一卷附記疑一卷

臣等謹案朱子撰是書蓋斥當時諸儒之雜于佛

老者凡蘇軾易傳十九條蘇轍老子解十四條張
九成中庸解五十二條呂希哲大學解四條皆摘
錄原文各為駁正于下記疑之作以程子門人記
錄師說有傳以已意遂致流入二氏者亦摘錄而
與之辨凡二十條

黎靖德編朱子語類一百四十卷

靖德導江人

臣等謹案朱子語類見于藝文志者有葉味道所

編本又王圻續通考載黃士毅亦有文公語類靖
德是編成于度宗咸淳庚午訂正并謫刪除重複
較他本特為修整云

劉清之戒子通錄八卷

清之字子澄臨江人紹興進士光宗時知袁州

劉荀明本釋三卷

荀東平人尚書左僕射摯之孫孝宗時知盱眙軍

汪晫編曾子一卷 子思子一卷

晬字處微績溪人咸淳中其孫夢斗獻此二書于朝
得贈通直郎

劉炎邇言十二卷

炎字子宣括蒼人

陳埴木鐘集十一卷

埴字器之永春人嘗舉進士授通直郎致仕

臣等謹案埴之學出於朱子明永樂中修五經大

全所稱潛室陳氏即埴也是編雖以集為名而實

則所作語錄凡論語一卷孟子一卷六經總論一卷周易一卷尚書一卷毛詩一卷周禮一卷禮記一卷春秋一卷近思雜問一卷史一卷自序謂取禮善問者如攻堅木善待問者如撞鐘義名曰木鐘今從四庫全書例列于子類

滕珙編經濟文衡前集二十五卷後集二十五卷續集二十五卷

珙字德章號蒙齋婺源人淳熙進士官合肥令與兄

璘俱遊朱子之門

臣等謹案是書蓋取諸朱子語錄文集分類編次
前集皆論學後集皆論古續集則補二集所遺也
又案別有分類標註之本為明朱吾弼重刊各標
要語簡端以備答策之用殊無足取

真德秀大學衍義四十三卷 讀書記六十一卷 政
經一卷

德秀見經類

臣等謹案馬端臨通考經類載真德秀西山讀書
記三十九卷其引陳振孫云其書有甲乙丙丁今
但有甲三十七卷丁二卷乙丙未見蓋振孫惟見
初行之本故云然今世所傳明時舊刊本中多乙
記二十二卷乃德秀門人湯漢所續刊序稱讀書
記惟甲乙丁為成書此與通考所載完缺不同理
宜著錄今從四庫全書之例列于子類其政經一
卷德秀再守泉州時所著在理宗紹定五年蓋晚

年之作亦振孫書錄解題中所未載故通考弗錄也

黃震黃氏日抄九十五卷

震見史類

陳淳北溪字義二卷

淳字安卿號北溪龍溪人嘉定十年授建功郎泉州安溪主簿未上而卒

臣等謹案此編蓋其門人清源王雋所錄

熊節性理羣書句解二十三卷

節字端操建陽人官至通直郎知閩清縣事

臣等謹案此編節所撰而熊剛大為之註剛大亦

建陽人受業于蔡淵黃幹嘉定中登進士掌建安書院

陳謨東宮備覽六卷

謨字中行泉州永春人慶元進士累官校書郎兼實

錄院檢討官

薛據孔子集語三卷

據字叔容永嘉人官至浙東常平提舉

張洪齊魚同編朱子讀書法四卷

洪字伯大魚字充甫皆鄱陽人

臣等謹案是書本朱子門人輔廣所輯鄱陽王氏復廣為後編洪與魚又因而補訂之

家山圖書一卷

不著撰人名氏

錢曾讀書敏求記曰家山圖書晦庵私淑弟子之
文

伊川粹言二卷

舊題張栻編

臣等謹案宋濂潛溪集有此書跋謂前序不著姓
氏相傳為張南軒栻撰則明初尚不著栻之名此
本當為後人據濂語補題也

唐棣唐氏遺編四卷

棣字彥思宜興人嘗受業于伊川程子

臣等謹案是書乃棣與門人共記平日問答之語

吳沆通言一卷

沆見經類

胡寅崇正辨三卷

寅字明仲建安人安國弟淳之子宣和進士仕至徽

猷閣直學士事蹟見宋史儒林傳

童伯羽玉溪師傳一卷附錄一卷

伯羽字蜚卿甌寧人朱子門人

李元綱聖門事業圖一卷

元綱字國紀錢塘人孝宗時上庠生

元綱自序畧曰大學之道必以致知為先予留心
道學幾三十載序為十圖共成一編以示同志蓋
欲咸知聖門事業之所在而不失趨向也

王介序略曰國紀之學以存心養性為本所造必
欲至于通晝夜之道明屈伸之理而後已日就月

將撰成十圖俾後學知所趨向又集內聖外王之
道作言行編等書行世

楊萬里庸言一卷

萬里字廷秀吉水人紹興進士累官秘書監江東轉
運使總領淮西江東朝議行鐵錢萬里不奉詔改贛
州乞祠遂不復出萬里嘗自名其室曰誠齋光宗親
書二字賜之後聞韓侂冑專權憂憤而卒謚文節

家頤子家子一卷

頤字養正眉山人

王似紫陽宗旨二十四卷

似東陽人

浩齋語錄二卷

舊題過源撰

臣等謹案是書卷末附源行實稱源字道源號浩

齋臨川人其書可疑處甚多疑是後人偽託之作

性理字訓一卷

舊題程端蒙撰程若庸補輯端蒙字正思德興人朱子門人淳熙七年鄉貢補太學生若庸字達原休寧人咸淳四年進士嘗充武夷書院山長

臣等謹案是書以四字為句規倣李瀚蒙求而不諧聲韻自古無此體裁疑亦後人所託名也

蔡沈洪範皇極內外篇五卷

沈字仲默元定子事蹟見宋史儒林傳

張行成皇極經世索隱二卷 皇極經世觀物外篇衍

義九卷 易通變四十卷 翼元十二卷

行成字文饒一作子饒臨邛人官直徽猷閣知潼川

府

王柏研幾圖一卷

柏見經類

鍾過皇極經書類要九卷

過字益齋廬陵人

祝泌觀物篇解五卷 皇極經世解起數訣一卷

泌字子涇德興人咸淳進士官饒州府三司提舉
鮑雲龍天原發微五卷

雲龍字景翔歙縣人景祐中鄉貢進士

丁易東大衍索隱三卷

易東見經類

道南三先生遺書十一卷

不著編輯名氏

臣等謹案是書摘錄楊時羅從彥李侗三家語錄

及雜著黃虞稷千頃堂書目載莆田宋端儀有道
南三先生遺書疑即是編

朱子文語纂編十四卷

不著編輯者名氏

臣等謹案是書取朱子文集語類約略以類相從
而不分門目前後亦無序跋蓋草創未完之本也
元

張理易象圖說內篇三卷 外篇三卷

理見經類

程端禮讀書分年日程三卷

端禮字敬叔號畏齋鄞縣人以薦為建平教諭遷台州路教授

謝應芳辨惑編四卷附錄一卷

應芳見史類

孫自強太極辨三卷

自強會稽人

許衡魯齋心法一卷

衡見經類

何中通書問一卷

中見史類

蘇天爵治世龜鑑一卷

天爵見史類

臣等謹案是書所採皆宋以前善政嘉言而大旨歸于培養元氣其目凡六曰治體用人守令愛人

為政而終之以止盜焉蓋其時妖寇自淮右延及
江東正干戈倣擾之際末篇殆有深意也

史伯璿管窺外篇二卷

伯璿見經類

王廣謀聖賢語論二卷

廣謀里貫無攷

明

成祖聖學心法四卷

前有永樂七年御製序大指以唐文皇作帝範十二篇自比云

明仁孝后內訓一卷

前有永樂三年正月望日自序是書凡二十四篇曰
德性曰修身曰慎言曰謹行曰勤勵曰警戒曰節儉
曰積善曰遷善曰崇聖訓曰景賢範曰事父母曰事
君曰事舅姑曰奉祭祀曰母儀曰睦親曰慈幼曰逮
下曰待外戚永樂五年頒行天下

性理大全七十卷

永樂中胡廣等奉勅撰成祖製序頒行天下

朱隱老皇極經世書說十八卷

隱老字子方號潛峯豐城人大學士朱善之父

張九韶理學類編八卷

九韶字美和後以字行清江人元末累舉不仕洪武

初以薦為縣學教諭遷國子助教改翰林編修致仕

歸後復徵入校書書成遣還

徐達左顏子鼎編二卷

達左字良夫平江人元季遁跡鄧尉山洪武初起為

建寧縣學訓導

臣等謹案是書為高陽所刪補并註陽嘉興人

顧諒西村省己錄二卷

諒字希武號西村上虞人洪武中以薦為無錫縣教

諭

方孝孺雜誠一卷

孝孺字希直一字希古天台人以薦召授漢中府學
教授建文中官至翰林侍讀學士改文學博士燕王
篡位抗節死事迹具明史本傳

臣等謹案孝孺終明之世未列謚典乾隆四十一

年奉

諭旨追錄前代忠烈

賜謚忠文

何孟春家語註八卷

孟春見史類

曾永業編曾子全書三卷

承業曾子六十二代孫序稱博士蓋襲職之宗子也

曹端太極圖說述解一卷 通書述解二卷 西銘述

解一卷 夜行燭

無卷數

端字正夫澠池人永樂舉人官霍州學正後改蒲州

事蹟見明史儒林傳

本傳略曰端五歲見河圖洛書即畫地質之父及

長專性理務實踐而以靜養為要讀宋儒書歎曰
道在是矣嘗言欲至于聖人之道須從太極上立
根脚又曰為人須從志士勇士不忘上參取又曰
孔顏之樂仁也孔子安仁而樂在其中顏淵不違
仁而不改其樂程子令人自得之又曰天下無性
外之物而性無不在焉性即理也曰太極曰至誠
曰至善曰大德曰大中名不同而道則一初伊洛
諸儒明道伊川後劉絢李籲輩身及二程之門至

河南許衡洛陽姚樞講道蘇門北方之學者翕然
宗之明興三十餘載而端倡明絕學論者推為明
初理學之冠

臣等謹累端以其父好釋氏乃採經傳格言切于
日用者為夜行燭一書進之謂釋氏以空為性非
天命之性老氏以虛為道非率性之道父從之其
書分類編輯為目十有五

趙邦清輯月川語錄一卷

邦清真寧人

臣等謹案是編所載皆曹端講學之語端嘗作月川交映圖擬太極學者稱月川先生

薛瑄讀書錄十卷續錄十二卷 從政名言二卷 薛子道論一卷

瑄字德溫河津人從魏希文范汝舟遊深于理學一本程朱永樂進士官至禮部右侍郎入閣預機務贈禮部尚書謚文清崇祀孔廟

瑄自識讀書錄曰橫渠張子云心中有所開即便
創記不思還塞之矣余讀書至心有所開隨即錄
之蓋以備不思而還塞也若所見之是否則俟正
於後之君子云

臣等謹案瑄年譜宣宗宣德元年服闋至都上章
願就教職宣宗特擢為御史尋差監沅州銀場從
政名言第二條稱吾居察院第四條稱余始自京
師來湖南蓋作于奉使沅州時也其道論所載皆

自讀書錄中摘出當是書賈別立此名以求售者
耳

尹直明良交泰錄十八卷

直見史類

邱濬大學衍義補一百六十卷 朱子學的二卷

濬見經類

黃畿皇極經世書傳八卷

畿字宗大香山人佐之父也

章懋楓山語錄一卷

懋字德懋蘭溪人成化進士累官南京禮部尚書謚

文懿

周琦東溪日談錄十八卷

琦字廷璽馬平人成化進士官至南京戶部員外郎

胡居仁居業錄十二卷

居仁見經類

楊廉序略曰正統間以理學為倡者薛文清一人

而已近年乃得餘干胡敬齋所為居業錄精確簡
當其言粹然讀書錄之外所見惟此耳蘄聞敬齋
嚴毅精苦力行不怠其議論實由涵養體驗得來
非考索探討所致也

臣等謹案別本有居業錄類編三十一卷為陳鳳
梧所輯凡分三十一類類為一卷鳳梧字文鳴廬
陵人弘治進士官至右都御史巡撫應天

蔡清性理要解二卷

清見經類

蔡清虛齋三書

無卷數

臣等謹果是編以看太極圖改名太極圖說以看河圖洛書說改名河洛私見而增以艾庵密箴五十條故曰三書為其裔孫廷魁所刊其名亦非清所自取也

張詡白沙遺言纂要十卷

詡字廷實南海人成化進士官至南京通政司左叅

議嘗受業於陳獻章

余祐文公先生經世大訓十六卷

祐字子積鄱陽人弘治進士官至雲南布政使內召
為太僕寺卿未及行又擢吏部侍郎未聞命而病卒

顧璘近言一卷

璘見史類

欽定續文獻通考卷一百七十三

欽定四庫全書

欽定續文獻通考卷一百七十四

經籍考

子 儒家下

明

王守仁傳習錄畧一卷

守仁見史類

黃宗羲曰先生反求諸心而得所性之覺曰致良

知良知為知致良知即行也特與朱子之說不無
抵牾而所極力表章者乃在象山遂疑先生或出
於禪豈知致良知乃因明而誠以人合天之謂其
去禪遠矣先生之言曰良知即獨知其與朱子牴
牾處總在大學一書朱子之解大學也先格致而
後誠意先生之解大學也即格致為誠意似有分
合之異然所謂慎獨一關因明致誠以進於聖人
之道則一也先生門人徧天下自東廓先生而外

諸君子其最著者其淵源分合之故亦略可觀云
臣等謹案明史藝文志載王守仁傳習錄四卷是
本為曹溶學海類編所載不著何人所編要非其
舊也

羅欽順困知記二卷續記二卷附錄一卷

欽順字允升泰和人弘治癸丑進士第三官南京國
子司業以忤劉瑾奪職後起為吏部尚書謚文莊事
蹟見明史儒林傳

本傳略曰時王守仁以心學立教欽順致書力辨其非嘗謂心之說混於禪學而不知有千里毫釐之謬為著困知記自號整菴

林希元曰先生自叙為學云昔官京師逢一老僧漫問何由成佛渠亦漫答禪語云佛在庭前柏樹子精思達旦恍然有得取證道歌讀之若合符節自以為至奇至妙天下之理莫或加焉後官南雍聖賢之書未嘗一日去手潛玩久之始知前所見

者乃此心虛靈之妙而非性之理也自此研磨體
認數十年用心甚苦年垂六十始了然有見於心
性之真而確乎有以自信

高攀龍曰先生於禪學尤極探討發其所以不同
之故自唐以來排斥佛氏未有如是之明且悉者
先生之功偉矣

徐問讀書劄記八卷

問字用中號養齋武進人弘治進士官至南京戶部

尚書謚莊裕

臣等謹案是書第五卷專闢陽明問嘗與羅欽順
書言黃佐促成之

崔銑士翼四卷 後渠庸言一卷

銑見經類

黃佐泰泉鄉禮七卷 庸言十二卷

佐見經類

王廷相慎言十三卷

廷相字子衡儀封人弘治進士官至兵部尚書

程敏政心經附註四卷

敏政見史類

呂柟涇野子內篇二十七卷 周子抄釋三卷 張子

抄釋六卷 二程子抄釋十卷 朱子抄釋二卷

柟見經類

黃宗羲曰闡學世有淵源皆以躬行禮教為本而
涇野實集其成觀其出處言動無一不歸于道而

心術隱微無毫髮可議卓然閔冉之徒無疑也異
時陽明先生講良知之學本以重躬行而學者誤
之反遺行而言知得先生尚行之旨以救之所謂
一髮千鈞時先生講席幾與陽明中分其盛一時
篤行之士爭出其門

陸深同異錄二卷

深見史類

夏良勝中庸衍義十七卷

良勝字于中南城人正德進士官至太常寺少卿

湛若水格物通一百卷

楊子折衷六卷

心性書

無卷

數
遵道錄八卷

甘泉新論一卷

若水見經類

臣等謹案若水格物通體例略做大學衍義楊子

折衷蓋闢宋儒楊簡之說心性書有圖有說復集

心性通三十五章做周子太極圖說通書之意其

遵道錄則所輯皆明道程子之說自序謂遵明道

也

劉陽論學要語一卷 洞語一卷 接善編一卷 人

倫外史一卷

陽字一舒安福人由舉人授碭山縣知縣官至監察

御史

臣等謹案是編舊總題曰劉兩峯集今從四庫全

書之例分叙其目列于儒家類

程瞳閑闢錄十卷

瞳見史類

楊向春皇極經世心易發微八卷

向春字體元號野厓普洱人

熊宗立洪範九疇數解三卷

宗立字道軒建陽人劉剡門人剡見經類

韓邦奇洪範圖解二卷 苑洛語錄六卷

邦奇見經類

胡纘宗願學編二卷 近取編二卷

續宗見史類

王崇慶海樵子一卷

宗慶見經類

王莫東石講學錄十一卷 心學錄四卷 大儒心學語

錄二十七卷

莫見史類

戴金三難軒質正

無卷數

金字純夫漢陽人正德進士官至兵部尚書

臣等謹案金以力行責已克終三者甚難因取以
名軒而徵集同時士大夫所贈詩辭序記論說銘
贊彙成是編

陳琛正學編二卷

琛見經類

舒芬太極繹義一卷 通書繹義一卷

芬見經類

李本說理會編十五卷

欽定四庫全書

欽定續文獻通考
一百二十四

本見經類

本自述畧曰學當以自然為宗警惕者自然之用
戒慎恐懼未嘗致纖息之力有所恐懼便不得其
正矣東廓云不警惕不足言自然而不警惕其失
也蕩斯言可為破的

聶豹困辨錄八卷

豹字文蔚號雙江永豐人正德進士官至兵部尚書
謚貞襄

戴經燕居答述二卷

經德清人聶豹之門人也

臣等謹案是編皆述豹講授之語

薛侃研幾錄

無卷數

侃見經類

周海門曰薛中離歸田後遠遊浙江會羅念庵于

青原書院已入羅浮講學于永福寺二十四年始

還家門人記所聞曰研幾錄

臣等謹案是書乃侃門人鄭二極所編

教英慎言集訓二卷

英字子發清江人正德進士官至河南布政使

顧亮辨惑續編七卷附錄二卷

亮字寅仲長洲人正德中況鍾知蘇州府嘗聘致幕

中

尤時熙擬學小記六卷續錄一卷

時熙字季美自號西川居士洛陽人嘉靖舉人官至

戶部主事

臣等謹案時熙師事劉魁傳王守仁良知之學有所心得輒為筆記其壻李根并其雜著編次之

王良心齋約言一卷

艮字汝止號心齋泰州人王守仁之門人

艮自述略曰格物之物即物有本末之物身與國家天下一物也格者知身之為本而國家天下之為末反己是格物工夫故曰身安而天下國家可

保也又曰道重則身重身重則道重以天地萬物
依于身不以身依于天地萬物聖人復起不易斯

言

王棟一庵遺集二卷

棟字隆吉號一庵泰州人良從弟嘉靖中由歲貢生
補江西南城訓導遷深州學正

錢德洪緒山會語二十五卷

德洪見史類

曹煜東溪蔓語一卷

煜浮梁人嘉靖丙戌進士

唐順之諸儒語要二十卷

順之見史類

蔡黻浚濱語錄二十卷

黻字天章號浚濱寧晉人嘉靖進士官至監察御史
巡按河南黻少從韓邦奇湛若水遊其講學宗旨不
出二家

王文祿廉矩一卷

文祿字世廉海鹽人嘉靖舉人

臣等謹案是編凡十八章皆以訓廉為主

蔣信道林諸集

無卷數

信字卿實號道林武陵人嘉靖進士官至貴州提學
副使嘗師事王守仁湛若水

臣等謹案是編乃其卜築桃岡時與諸弟子講學
之書而其門人章評所刊者

樊深西田語畧二十三卷續集二十九卷

深見史類

何祥識仁定性解註二卷

祥字克齋內江人嘉靖舉人

薛應旂方山紀述一卷 薛子庸語十二卷

應旂見經類

臣等謹案紀述乃其所鈔先正格言分上下二篇
上篇皆論性命之理下篇則論治道也庸語乃其

講學之語分二十四篇

侯一元二谷讀書記二卷

一元字舜舉樂清人嘉靖進士仕至江西布政使

阮鶚禮要樂則二卷

鶚桐城人嘉靖進士官至右副都御史巡撫福建

陳建學部通辨十二卷

建字廷肇東莞人嘉靖舉人官知信陽縣

王諍大學衍義通略三十一卷

諍號竹巖永嘉人嘉靖進士官至右僉都御史巡撫
貴州

孫丕揚格物圖一卷 論學篇一卷

丕揚富平人嘉靖進士官至吏部尚書謚恭介

耿定向耿子庸言二卷

定向見史類

胡直胡子衡齊八卷

直字正甫泰和人嘉靖進士官至福建按察使

臣等謹案直之學出于歐陽德及羅洪先故以王
守仁為宗嘗與門人講學螺水上輯問答之語為
是書

魏時亮大儒學粹九卷

時亮字敬吾南昌人嘉靖進士官至工部侍郎

臣等謹案是書取周子二程子張子朱子及陸九

淵薛瑄陳獻章王守仁九家之言人各為卷

徐用檢三儒類要五卷

用檢字克賢號魯源蘭谿人嘉靖進士官至南京太常寺卿

臣等謹案是書所謂三儒者薛瑄陳獻章王守仁也

韓萬鍾性理三書圖解九卷

萬鍾蘄州人

臣等謹案是篇所云三書者易學啓蒙律呂新書洪範皇極內篇也

李材見羅全書二十卷

材字孟誠豐城人嘉靖進士官至右僉都御史撫治
鄖陽

臣等謹案材惠世之學者每朱王兩家格物致知
之說爭衡聚訟因揭修身為本一言以為孔曾宗
傳而謂知止即知本又謂格物之功散見八條目
中以朱子補傳為誤其學較姚江末派為近實顧
憲成頗稱之是編乃其講學之語材門人李復陽

官無錫令時所輯

方學漸心學宗四卷

學漸見史類

孔承侗日言一卷

承侗字永冠曲阜人至聖先師六十代孫官至荆王
府長史

徐中性理圖說一卷

中字成中番陽人

俞邦時一書增刪四卷

邦時號敬軒新昌人

臣等謹案是編名一書者以一為本也本邦時所撰

國朝康熙己卯呂夏音復增刪之故題曰一書增刪
楊道會性理抄二十卷

道會字惟中晉江人隆慶進士官至湖廣左布政使
劉元卿諸儒學案八卷

元卿見經類

唐鶴徵憲世編六卷

鶴徵見經類

林昺羣書歸正集十卷

昺號方塘鄞縣人隆慶中諸生

臣等謹案此書為昺八十四歲時所作本四十二卷其從孫御史祖述刪為十卷仍分十六門

呂坤呻吟語六卷 呻吟語摘二卷

坤見經類

臣等謹案坤呻吟語摘乃其晚年定本較初刊之本彌為簡要云

范涑言十卷

涑見史類

汪應蛟中銓六卷

應蛟見史類

臣等謹案是編皆其講學之語以當日諸儒各立

門戶應蛟欲無所偏倚故以中銓為名云

周汝登王門宗旨十四卷

汝登見史類

臣等謹案是編首載王守仁講學之語並其奏疏
雜著詩文而以王良徐曰仁錢德洪王畿之說次
焉

徐三重信古餘論八卷 庸齋日記八卷

三重見史類

鄒元標南皋語義合編四卷

元標字爾瞻號南皋吉水人萬厯進士官至左都御

史謚忠介

臣等謹案是編乃其門人所輯以講學者為會語
說經者為解義故總名曰語義合編

趙仲全道學正宗十八卷

仲全字梅峯涇縣人

顧憲成小心齋劄記十六卷 顧端文公遺書三十七

卷附年譜一卷

憲成字叔時無錫人萬厯進士官至吏部文選司郎
中削籍歸起南京光祿寺少卿移疾不赴卒于家崇
禎初贈吏部右侍郎謚端文

錢一本範衍十卷 龜記四卷

一本見經類

岳元聲聖學範圍圖

無卷數

元聲字之初號石帆嘉興人萬厯進士官至兵部侍

部

臣等謹案是書一名範圍教圖大旨以儒教統攝

二氏

王三極性理備要十二卷

三極號少墩仙遊人

高攀龍編二程節錄四卷文集鈔一卷附錄一卷

攀龍見經類

傅新德南雍誠勗淺言一卷

新德字元明又字商盤定襄人萬厯進士官至國子
監祭酒贈禮部右侍郎謚文恪

馮從吾馮子節要十一卷

從吾見史類

吳道南文華大訓歲解殘本三卷

道南見史類

方大鎮荷薪義八卷

大鎮字君靜桐城人萬厯進士官至大理寺少卿

臣等謹案始大鎮父學漸講學桐川大鎮追述父訓及與同社諸人問答之語詮次成帙其大旨在闡良知之說于儒釋分別辨論極詳

徐必達周張全書二十二卷

必達見史類

正蒙釋四卷

舊題高攀龍集註徐必達發明

臣等謹案葉向高序此書乃必達所自定非攀龍

原本也

潘士達增訂論語外篇四卷

士達字在聞安吉州籍烏程人萬厯進士官至廣東提學僉事

臣等謹案是書取諸子百家所載孔氏之言分類排纂做論語二十篇之數蓋因南昌李棣舊稿而增葺之

王在晉龍沙學錄六卷

在晉見史類

龍遇奇聖學啓關臆說三卷

遇奇字才卿號紫海吉安人萬厯進士官至監察御

史

朱鴻經書孝語

無卷數

鴻字子漸仁和人萬厯間諸生

劉宗周聖學宗要一卷 學言三卷 人譜一卷 人

譜類記二卷 證人社要言一卷

宗周見經類

惲日初編劉子節要十四卷

日初號遜庵武進人劉宗周門人

王化振諸儒要語九卷

化振字宇春滁州人萬厯舉人官戶部主事周汝登之門人

文翔鳳太微經二十卷

翔鳳字天瑞三水人萬厯進士官至太僕寺少卿

呂維祺存古約言六卷

維祺見經類

臣等謹案是書凡十二篇大畧以朱子家禮為主
並採擇諸家之言為條例註釋而以箴誡格言附
後

吳桂森真儒一脉

無卷數

桂森見經類

鍾韶論語逸編三十一卷

韶字牙臺海鹽人

張信民印正稿六卷

信民澠池人孟化鯉之門人

臣等謹案信民傳姚江良知之學其門人馮奮庸
等錄其平日問答為是書

辛全衡門芥一卷 經世碩畫三卷

全字復元號天齋絳州人萬厯末貢生以特薦授知
府未赴官而卒

李經綸洪範皇極注四卷

經綸見經類

喬中和說疇一卷

中和見經類

賀時泰思聰錄一卷

作師編一卷

人模樣一卷

時泰字叔交一字陽亨江夏人少為諸生以聾廢因

自號聾人

臣等謹案思聰錄一書為其子大學士逢聖所編

皆時泰平日講學之語

王應昌傳習錄論述參一卷

應昌見史類

章世純留書別集一卷

世純見經類

臣等謹案留書別集初名己未留周鍾序之張煒
如以刊本未善因為編定先後考正標題訂為此
本

性理綜要二十二卷

舊題詹淮輯陳仁錫訂正淮號柏山新安人仁錫見經

類

臣等謹案是書今審定為庸俗坊本又有性理標

題彙要實即此書蓋坊賈改新名以求售者

黃道周三易洞璣十六卷 榕壇問業十八卷

道周見經類

吳麟徵家誠要言一卷

麟徵字來皇號磊軒海鹽人天啓進士官至太常寺
少卿明亡殉節

世祖章皇帝賜諡忠節

臣等謹案是編皆其居官時寄訓子弟之書其子

蕃昌摘錄成帙蕃昌字仲木劉宗周門人

喬可聘讀書劄記四卷

可聘字君徵一字聖任寶應人天啓進士官至監察

御史

林允昌弟經一卷 經史稽義二十二卷

允昌見經類

成勇消閒錄十卷

勇字仁有安樂人天啓進士官至南京監察御史崇禎中以劾楊嗣昌謫戍寧波衛福王時起為原官不赴被縋而終是編乃其講學之語

張星顏子繹五卷

星永城人崇禎進士官光祿寺署丞

陳龍正程子詳本二十卷

龍正見史類

鍾人傑性理會通七十卷續編四十二卷

人傑字瑞先錢塘人

李公柱學脉正編五卷

公柱初名松字子喬嘉善人宗禎進士官歙縣知縣

沈壽民開道錄十六卷

壽民字眉生號耕巖宣城人崇禎中行保舉法巡撫

張國維以壽民應詔甫入都即劾楊嗣昌奪情熊文燦撫賊留中不報乃移疾歸

王尹道學迴瀾八卷

尹字莘民號覺齋安福人嘗從鄒元標高攀龍講學于首善書院會黨禍起乃歸里崇禎末大學士陳演欲薦之辭不就是編乃其門人所錄大旨力闢心學辨陽儒陰陰釋之誤

顧樞西疇日抄二卷

樞字庸庵無錫人天啓舉人顧憲成之孫高攀龍之

門人

潘平格求仁錄十卷

平格字用微慈谿人

陳士槐河圖發微

無卷數

士槐字植甫莆田人明季諸生

張自勲卓庵心書四卷

自勲見史類

朱朝瑛壘庵雜述二卷

朝瑛見經類

孔子遺語一卷

不著編輯者名氏

易十三傳十三卷

不著撰人名氏

參兩

無卷數

不著撰人名氏

太極圖分解一卷

不著撰人名氏

道一編六卷

不著撰人名氏

宋先賢讀書法一卷

不著撰人名氏

性理羣書集覽七十卷

不著撰人名氏

溫璜陸氏母訓一卷

璜字寶忠烏程人崇禎進士官徽州府推官

臣等謹案是編蓋錄其母陸氏之訓璜于明亡後
殉節乾隆四十一年

賜諡忠烈

欽定續文獻通考卷一百七十四

欽定四庫全書

欽定續文獻通考卷一百七十五

經籍考

子 道家 法家

宋史藝文志道家類一百二部三百五十七卷

不著錄者十三

部

遼金元三史不立藝文志散見各紀傳中

明史藝文志道家類五十六部二百六十七卷

宋

江適沖虛至德真經解八卷

適自署杭州州學內舍生

臣等謹案是書乃適所註列子其稱沖虛至德真經者考唐書藝文志天寶元年詔號列子為沖虛真經又據晁公武讀書志宋景德中加號至德故有此名也

朱子陰符經考異一卷

朱子見史類

葛長庚道德寶章一卷

長庚字白叟號白玉蟾又以其祖仕瓊而生別號海
瓊子閩清人嘉定間封紫清真人

夏元鼎陰符經講義四卷

元鼎字宗禹自號雲峯散人永嘉人

袁淑真陰符經集解三卷

淑真官朝散郎行潭州長沙縣主簿

俞琰陰符經註一卷

琰見經類

林希逸莊子口義十卷

希逸見經類

褚伯秀南華真經義海纂微一百六卷

伯秀杭州道士

杜道堅文子續義十二卷

道堅字南谷當塗人武康計籌山昇元觀道士

極沒要緊一卷

舊題公是先生撰

臣等謹案公是先生宋劉敞也是書皆摭拾郭象
莊子註語聯綴成文疑為好事者所依托以其為
道家言故附載于宋時道家諸書之後

金

劉處元陰符經註一卷

處元道士重陽子王嘉七弟子之一也

元

吳澄道德真經註四卷

澄見經類

澄跋曰莊君平所傳章七十二諸家所傳章八十
一然有不當分而分者定為六十八章上篇三十
二章二千三百六十六字下篇三十六章二千九
百二十六字凡五千二百九十二字

明

宋濂龍門子凝道記二卷

濂見史類

陸西星南華經副墨八卷

西星字長庚號方壺外史

焦竑老子翼三卷 莊子翼八卷 莊子闕誤一卷附

錄一卷 陰符經解一卷

竑見經類

朱得之莊子通義十卷

得之自號參元子烏程人一云靖江人

方時化陰符質劑一卷

時化見經類

陶望齡解莊十二卷

望齡字周望號石簣會稽人萬歷進士官至國子監

祭酒諡文簡

文德翼讀莊小言一卷

德翼見史類

方以智藥地炮莊九卷

以智字密之桐城人崇禎進士官翰林院檢討

朱孟嘗道德經說奧二卷

臣等謹案是書附刻朱翊鉞廣譙堂集後孟嘗當

是字但未審即翊鉞作抑或其子孫所作也

陳繼儒養生膚語一卷

繼儒見史類

朱清仁含素子塵譚十卷

清仁號懷白別號含素子黃州人流寓南昌為道士
朱應昂引年錄二卷

應鼎靖江人

古今南華內篇講錄十卷

不著撰人名氏

攝生要語一卷

不著撰人名氏

釋德清觀老莊影響論一卷

德清字登印號慙山全椒人

臣等謹案此外有陰符經三皇玉訣三卷金陵道人唐淳陰符經詮一卷姑射山太元子侯善淵陰符經註一卷許劍道人手刊古老子二卷其時代俱不可考附識于此

右道家

臣等謹案馬端臨經籍考仍班志之例輯法家而又于史類別立刑法一門蓋以法家者流義取信

賞必罰如管韓諸子之書大旨雖主嚴峻而法之所該自廣要不專論乎刑名至于刑制及明慎用刑之道則別詳于刑法門中固非複出也後世祖述管韓諸書者傳世甚少故宋史明史之藝文志俱不載法家今依馬氏之例續輯此門擇其有合者列焉他若宋之宋慈洗冤錄元之王與無冤錄明之吳訥祥刑要覽等書俱輯入史類刑法門不復見于此云

明

劉續管子補註二十四卷

續見經類

朱長春序畧曰管子伯圖大要三事一曰法二曰財三曰兵但全書多雜大率偽作法如四維四順雜則為急璣必誅財如倉廩衣食乘馬雜則為股削龍斷兵如七法幼官雜則為設詐權以奇故其書有春秋之文有戰國之文有秦先周末之文其

體立辨自經言外內言十二外言十二短言區言
十七雜篇十九輕重全于偽矣乃自尹知章初註
燕陋劉氏所定又甚畧往往多舛礙讀蓋真輕重
篇弗論庶其忠于管氏

朱長春管子權二十四卷

長春字大復烏程人萬歷進士官刑部主事

長春自序略曰嘗讀內外傳管氏行事畧具經國
寄軍于農乃內匡多欲之君而四伐九會帖然大

服意區區富強名法數術效不至是今詳攬幼官
五行白心內業諸篇而後知管子原于道不與申
韓同科特取徑小耳聖人所以病其詘小病其任
道之用小也故桓公王霸之交管子道法之交而
其書則道法之雜也

梅士享詮叙管子成書十五卷

士享字伯獻宣城人

門無子韓子迂評二十卷

臣等謹案陳深序稱門無子俞姓吳郡人篤行君子

法家裒集

無卷數

不著撰人名氏

臣等謹案蘇祐題辭稱從史陳永以是集見曰司籍潘智手錄因命補綴付之梓則是編當為永所輯定

右法家

欽定續文獻通考卷一百七十五

欽定四庫全書

欽定續文獻通考卷一百七十六

經籍考

子

雜家上

雜學
雜攷

臣等謹案馬端臨因班史之例立雜家一門其說則班固所稱雜家者流出於議官兼儒墨合名法知國體之有在見王治之無不貫此雜家所長也要之漢以後名家墨家之屬絕少專書其有出入

經史泛濫百家旁及乎名物象數之細者俱得以
雜家目之馬氏所載不敵小說家之半南宋以來
厥類滋多今從四庫全書例析而為六曰雜學曰
雜攷曰雜說曰雜品曰雜纂曰雜編以次採輯如
左

宋史藝文志雜家類一百六十八部一千五百二十三
卷

遼金元三史不立藝文志散見各紀傳中

明史藝文志雜家類六十七部二千二百八十四卷

宋

崔敦禮芻言三卷

敦禮本河北人南渡後與弟敦詩同登紹興進士官至諸王大小學教授居于溧陽

子恕編心傳錄三卷 日新錄一卷

恕張九成之甥

臣等謹案此二書皆錄張九成語

倪思經鉅堂雜志八卷

思見史類

陳錄善誘文一卷

錄自稱丹穴老人里貫無攷

臣等謹案是編皆通俗勸善之言

施清臣几上語一卷 枕上語一卷

清臣號東洲淳祐間人自稱赤城散吏

臣等謹案是書皆本二氏之旨而以儒理附會之

吳大有千古功名鏡十二卷拾遺一卷

大有字勉道號松壑嵯縣人寶祐間遊太學率諸生上書言賈似道姦狀不報歸與林昉仇遠輩以文酒自娛元初辟為國子檢閱不赴

臣等謹案是書分十五類皆闡揚因果之說

李元綱厚德錄四卷

元綱見儒家類

臣等謹案此錄盛陳果報兼述神怪

李昌齡樂善錄二卷

昌齡里貫無攷

臣等謹案是書大旨皆談罪福因果所記宋事居

多

何坦西疇常言一卷

坦盱江人

李之彥東谷所見一卷

之彥號東谷永嘉人

樂庵遺書四卷

舊題李衡撰其門人龔昱編衡見經類昱字立道崑

山人

臣等謹案是書所言大抵與隆萬間心學相合當

是姚江末流偽託之作

樵談一卷

舊題許斐撰斐字忱父號梅屋海鹽人

臣等謹案是編皆勸戒之言然詞氣如出屠隆陳

繼儒一輩人口殊不類宋人之作

金

李純甫鳴道集說一卷

純甫字之純宏州襄陵人承安中登進士前後三入翰林正大末出倅坊州未赴改京兆府判官卒于南京

元

敖剌中說三卷

劉古文淵字其爵里無考

臣等謹案是書大旨本乎圖書而雜以佛老

劉君賢學問要編六卷

君賢字文定恭和人元末兵亂依母族袁氏於雩昌
遂冒姓袁

華悰韓慮得集四卷附錄二卷

悰韓字公愷號貞固處士無錫人入明後不仕而終
臣等謹案是編乃其詒訓子孫之書附錄二卷則

詩文雜著也

明

劉基郁離子二卷

基見史類

徐一夔序略曰郁離者離為火文明之象言用之則其文郁然為盛世文明之治也

王禕青巖叢錄一卷 卮辭一卷

禕見史類

蘇伯衡空同子贅說一卷

伯衡字平仲金華人本宋蘇轍之裔以轍子遲守婺州因家于婺元末貢于鄉洪武初徵入禮賢館仕至處州教授

臣等謹案李夢陽亦著空同子與此同名實兩書也

王達筆疇二卷

達字達善號耐軒居士無錫人洪武中以明經薦為

縣學訓導再遷國子助教永樂初擢翰林編修官至
侍讀學士

唐順之曰是書大率稱引老莊然而古先所以厚
施薄責懲忿窒慾之緒言亦往往而在也

黎久之黎子雜釋一卷

久之字未齋臨川人官高安縣知縣

臣等謹案是書雜舉奇怪之事推求其理詞極辨
博而大旨仍歸于神怪末綴論文二條皆務反舊

說以示新奇云

岳正類博雜言一卷

正字季方號蒙泉溇縣人正統戊辰進士第一由編
修改修撰天順中入閣預機事以謀去石亨曹吉祥
不成謫欽州同知後逮繫杖戍肅州憲宗立復本官
留侍經筵又以忤大學士李賢出為興化府知府嘉
靖初追贈太常寺卿謚文肅

臣等謹案是書雜論陰陽五行及醫卜星算之說

中間論大衍之數及皇極經世之數亦頗有發明
明史藝文志作二卷今已編入正類博稿中此本
乃曹溶學海類編中所收僅存六頁非其全也

胡澄警時新錄一卷

澄字景高臨川人

臣等謹案是書凡五十篇篇有標題皆警戒下愚
之語

桑悅桑子庸言一卷

悅字民懌常熟人成化舉人官至柳州府通判

祝允明祝子罪知七卷 浮物一卷 讀書筆記一卷

允明見史類

王宏山志曰祝枝山狂士也著祝子罪知錄其舉刺予奪言人之所不敢言刻而戾僻而肆蓋學禪之弊乃知屠隆李贄之徒其議論亦有所自非一日矣

臣等謹案允明浮物一編取韓愈文浮物也氣猶

水也之義命名亦皆務為新奇之論甚至以詩三百篇春秋二萬言為聖人之煩可謂放言無忌惟讀書筆記一編言頗近理蓋其少時作也

李夢陽空同子一卷

夢陽字獻吉慶陽人徙扶溝弘治進士官至江西提學副使

空同子纂一卷

不著編輯者名氏

臣等謹案是書取李夢陽空同子每篇摘抄十之三四載曹溶學海類編

王俊濯舊稿一卷

俊字機翁戈陽人弘治進士官至禮部尚書謚文莊

王廷相雅述二卷

廷相見儒家類

何景明大復論一卷

景明見史類

鄭善夫經世要談一卷

善夫字繼之閩縣人弘治進士官至南京吏部驗封

司郎中

顧應祥惜陰錄十二卷

應祥見史類

臣等謹案是編前數卷論理論學諸篇皆主良知

之說

薛蕙西原遺書二卷

約言

無卷數

蕙字君采亳州人弘治進士官至吏部考功司郎中
錢琦錢子測語二卷

琦字公良海鹽人正德進士官至思南府知府

陳相百感錄一卷

相字汝弼號古埜道人懷寧人前有正德庚午曾漢
序稱其年四十貢成均歷司封

臣等謹案是書倣莊子寓言多假蟲魚鳥獸以寄

其意

陳沂拘虛晤言二卷

沂見史類

王文祿竹下寤言二卷 海沂子五卷

文祿見儒家類

唐樞宋學商求一卷附錄一卷 疑誼偶述一卷 一

庵雜問錄一卷 嘉禾問錄一卷 轄園窩雜著一卷

酬物難一卷 咨言一卷 景行館論一卷 積承

錄一卷 一庵語錄一卷 因領錄一卷

樞見經類

臣等謹案樞書大旨宗王守仁之緒論專以闡明心學而多涉禪理內如一庵雜問錄因領錄二編語意率援儒入墨尤為誕謾不經積承錄乃其門人吳思誠所編一庵語錄其壻陸稭所編因領錄則其壻吳允恭所編也

張純存愚錄一卷

純永嘉人嘉靖舉人官至南康府知府

皇甫汈百泉子緒論一卷

汈字子循長洲人嘉靖進士官至雲南按察司僉事

臣等謹案是書凡八篇一曰原墨二曰罪言三曰

非俗四曰詭士五曰刺飲六曰慨禮七曰詒戚八曰知難皆為時弊而發其詆臺諫惡習甚至

沈愷夜燈管測二卷

愷字舜臣號鳳峯華亭人嘉靖進士官至湖廣布政

司右參政

臣等謹案是書乃愷為寧波知府防倭海上時所作凡一百篇借事寓言以示勸戒大致規摹郁離

子

羅洪先冬遊記一卷

洪先字達夫吉水人嘉靖己丑進士第一官至贊善
隆慶初贈太常寺少卿謚文恭

蔡羽太藪外史一卷

羽字九達自號林屋山人又稱左虛子吳縣人由國

子生授翰林院孔目

黃省曾擬詩外傳一卷 客問一卷

省曾見史類

臣等謹案是書擬詩外傳雜論治亂之理凡三十條每條引詩二句全仿韓嬰詩外傳之例客問凡十五則前四則論陰陽象緯後十一則論人事

鄧球閒適劇談五卷

球自號三吾寄漫子祁陽人嘉靖進士官至銅仁府

知府

陸樹聲汲古叢語一卷

病榻寤言一卷

耄餘雜識

一卷

樹聲字與吉號平泉華亭人嘉靖辛丑進士第一官

至禮部尚書謚文定

陳絳金壘子四十四卷

絳字用揚上虞人嘉靖進士官至太僕寺卿

臣等謹案是書本名山堂隨鈔陶望齡為刪汰之

改題今名以所居有金巖山也

張鍊經濟錄二卷

鍊字伯純武功人嘉靖進士官至湖廣按察司僉事

周思兼學道記言五卷 事行紀略一卷

思兼字叔夜華亭人嘉靖進士官至湖廣按察司僉事遷廣西提學副使未上而卒

臣等謹案是編蓋語錄之類未附補遺家訓遺語

各數則又彙錄碑版傳志等文為事行紀略皆其

子紹元紹節所增輯也

李豫亨推篷寤語九卷餘錄一卷 三事邈真一卷

豫亨字元薦松江人

臣等謹案豫亨自序其推篷寤語謂舟之無所見者蓬蔽之人之懵所知者寐障之此書欲啟昔之寐為今之覺故曰推篷寤語至三事邈真一編則以有生所必需者衣食居處三事因為原其所由始及古今成行可為世則者綴于篇

來知德瞿塘日錄十二卷

知德見經類

羅汝芳一貫編四卷

近溪子明道錄八卷

會語續

錄二卷 識仁編二卷

汝芳見經類

臣等謹案識仁編二卷為其門人楊起元所編蓋

取程子為學須先識仁之語

鄭曉古言二卷

曉見經類

臣等謹案是編議論偏僻多不近理如以曲學阿世之公孫宏為勝司馬光以聚斂誤國之王安石為遠過韓范富歐甚至謂堯舜非生知安行大率務為新奇之說而顛倒是非有所不顧又謂佛言空道家言虛儒言太極只一箇空圈為學祇要還此本體謂吾儒格致誠正與佛老無甚異所見如此其學術槩可知矣至于以竹書紀年所載伊尹

事誤為逸周書以大禹謨為今文尚書之類援據訛舛抑其小疵也

張翀渾然子一卷

翀字子儀柳州衛籍馬平人嘉靖進士授刑部主事以疏劾嚴嵩下詔獄謫戍都勻隆慶初起為吏部主事官至刑部右侍郎

臣等謹案是書凡十八篇篇各標題皆設為主客問答旁引曲證以推明事物之理大抵規仿劉基

郁離子

王世懋經子臆解一卷 望崖錄二卷 澹思子一卷

世懋見史類

周宏祖內外篇二卷

宏祖字少魯麻城人嘉靖進士官至南京光祿寺卿
臣等謹案是編內篇所論皆性命道德事物多本
于老莊之指外篇則自天文地理以至錢穀甲兵
皆有論亦祇略涉籀籀而已

沈鯉文雅社約一卷附錄一卷

鯉字仲化歸德人嘉靖進士官至大學士謚文端

臣等謹案鯉里中有文雅臺相傳即夔相之圃鯉與里人修舉社飲之禮以禮法相約凡書劄宴會稱呼揖讓交際冠服閑家御下田宅器用勸義明微冠婚喪祭身檢心檢十六條附錄社倉約義學約族田約勸施迂談垂涕衷言鄉射約篤親會墓享儀沈氏祠堂生忌單女訓約言十篇明史稱鯉

念時侈因稽典制自冠婚喪祭以及酬酢往來率
定為中制頒示天下蓋去奢崇儉鯉之本志此書
猶是意也

趙台鼎脉望八卷

台鼎字長元自號丹華洞主內江人大學士貞吉子
袁衷等庭幃雜錄二卷

衷嘉善人父彥坡生五子長即衷次曰襄曰裳曰表
曰衷衷嘗舉于鄉衷游文徵明之門能以文學世其

家裏等錄其父母之訓而錢曉為之刪定云

袁士瑜海蟲編二卷

士瑜號七澤公安人即宗道宏道中道之父

臣等謹案是書大旨以儒釋二家同源異派或援釋疏孔或證孔于釋謂濂洛諸儒于聖人書詮釋妙暢如樽注海是編如蟲注海故名海蟲編其釋明德謂即是良知釋止至善謂住于善亦非至善皆本釋氏之虛寂與無善無惡之說而衍之蓋沿

姚江之末流而變本加厲者耳

嚴堯黻槐亭漫錄

無卷數

堯黻字汝儀號槐亭朝邑人官房縣主簿

臣等謹案是書凡十一篇曰明元曰太極曰天文

曰地理曰時令曰人物曰性命曰鬼神曰文史曰

雜著曰拒邪

胡袞東水質疑六卷

袞字補之自號味菜山人鄱陽人嘉靖中官台州教

授東水者其所居也

臣等謹案是書前四卷皆史論起周訖宋後二卷皆讀書題記自左傳國語暨諸子集起周訖明

朱得之宵練匣十卷

得之見道家類

臣等謹案是書凡分三編曰稽山承語紀其聞于師者也曰烹芹漫語紀其聞于友者也曰印古心語紀其驗于經典而有得于心者也皆提唱心學

陽儒陰釋之言

陳于陞意見一卷

于陞字元忠南充人大學士以勤之子隆慶進士官
亦至大學士

蔣以忠藝圃琳瑯四卷

以忠字孝甫常熟人隆慶進士官至廣平府知府

臣等謹案是書因何景明大復論門目太狹推而
廣之自從化至殖業凡八十二篇所論皆類集古

人成語而以己意聯絡之詞多排偶大致與類書相似

于慎行筆麈十八卷

慎行見史類

臣等謹案是編分三十五類所紀皆明代典故亦頗及雜說

管志道問辨牘四卷續問辨牘四卷 從先維俗議五

卷

志道見經類

趙鴻賜無甚高論七卷

鴻賜字承元桐城人嘉靖中副都御史鉞之子

周宏禴何之子一卷

宏禴字元孚麻城人萬歷進士官至尚寶司少卿

屠隆鴻苞四十八卷

隆見經類

臣等謹案是書所言放誕而駁雜蓋李贄之流亞

也

楊起元證學編四卷附證學論策一卷

起元字貞復廣東歸善人萬厯進士官至吏部左侍郎謚文懿

臣等謹案是編大抵講學之語其論佛仙有達摩西來單傳直指儒生學士從此悟入然後稍接孔脉云云援儒入墨誣誕甚矣

張恒因明子

無卷數

恒字伯常嘉定人萬厯進士官至太常寺少卿

臣等謹案是書于儒釋之辨言之甚力屢提幽明

二義以佛法為幽教聖道為明教因明二字謂此

馮渠進修錄三卷

渠字謙川江西新城人萬厯進士

臣等謹案是書分二十篇全規仿論語之文

程德良三一子

無卷數

德良字凝之號雲連雲夢人萬厯進士官崇信縣知縣

臣等謹案是書凡三篇以立德立功立言為序大旨欲合儒釋為一耳

詹在泮微言四卷附說書隨筆一卷

在泮字定齋衢州人萬厯進士

臣等謹案是編雜輯明代講學語錄其說書隨筆則在泮自著總不外乎借禪言以闡儒理也

吳應賓宗一聖論二卷

應賓字尚之桐城人萬厯進士官翰林院編修

臣等謹案是書闡發性命多入禪宗

袁黃祈嗣真詮

無卷數

黃見史類

焦竑支談三卷 焦弱侯問答一卷

竑見經類

臣等謹案支談主于三教歸一問答為潘曾紘所

編率妄誕之語

吳炯叢語十二卷

炯字晉明華亭人萬厯進士官杭州府推官

祝世祿環碧齋小言一卷

世祿字無功江西德興人萬厯進士官至尚寶司卿

臣等謹案是書統以禪門之說附合儒理

郝敬時習新知六卷

敬見經類

曾偉芳西行草一卷

偉芳字君彥號滄巖惠安人萬厯進士官至兵部武

選司員外郎謫賓州州判天啟中贈布政司使叅議

臣等謹案是書皆其雜著之文大要以王守仁之

學為主

賀應保傳家迂言一卷 迂議一卷 迂億四卷

應保字宏任號正予永新人

曹于汴共發編四卷

于汴字自梁安邑人萬厯進士官至左都御史

臣等謹案是編乃其與門人問答語持論多涉老

氏之指

陳伯友盡心編一卷 證語二卷 海鷗居日識二卷

伯友字中怡濟寧州人萬厯進士官至太常寺卿

臣等謹案其說大抵沿良知之學而參入禪機

葉秉敬寅陽十二論二卷

秉敬見經類

臣等謹案是編分十二篇曰太極曰仁孝曰性善
曰工夫曰勉強曰學問曰資質曰知行曰理欲曰

好惡曰零總曰獨並其說喜為新奇而於理殊多

未愜也

戴君恩剩言十四卷

君恩字忠甫澧州人萬厯進士官至四川兵備副使

臣等謹案是編乃其家居所著其學出于姚江至

謂孔子近禪孟子近道尤為荒誕云

張後覺宏山集四卷

後覺字志仁號宏山荏平人官華陰縣訓導

臣等謹案後覺嘗受業於尤時熙其學源出姚江
推闡彌深彌墮禪趣其第一卷教言第二卷語錄
皆門人趙維新所編書中動稱顏山農宗旨可見
趙維新感述錄六卷續錄四卷

維新字素衷在平人官長山縣教諭

臣等謹案此二錄即感其師張後覺之言而述之
故曰感述

曾大奇治平言二卷

大奇字端甫泰和人

臣等謹案明神宗之末庶事叢脞大奇是書略仿賈誼新書而文格則多近蘇氏策論

周士元論學緒言六卷

士元字志尹吉水人

臣等謹案是書首載鄒元標序蓋萬厯時人也其論學大抵以陳獻章王守仁為宗而立論多墮于空虛云

林兆恩林子全集四十卷

兆恩字懋勛號龍江又號子谷子又稱三教先生莆

田人

屠本峻韋弦佩

無卷數

本峻字田叔鄞縣人以蔭入仕官至福建鹽運同知

臣等謹案是書大旨以性情嗜慾之偏為疾病以

清淨忍耐之法為醫藥後視履一篇亦謹身寡過

之意

竇文照紀聞類編四卷

文照字子明秀水人萬厯中官光祿寺典簿

臣等謹案是書每卷分六類亦格言之流朱國祚跋稱其孝行蓋以人重之也

周伯耕虞精集八卷

伯耕字更生莆田人

臣等謹案是書名虞精者蓋取虞人獵百禽之精語大率銘鑄故事以成文欲以博麗見長而襍積

之痕未化也

王貞善王氏二書選要十一卷

貞善字如性恭和人

臣等謹案是編為鄒元標選定書名亦元標所題
凡靜談五卷前四卷皆其語錄第五卷附雜文五
篇其持論宗陸九淵又讀史法戒六卷前三卷為
法言後三卷為戒言皆紀古人言行之有關勸懲
者

朱健蒼崖子

無卷數

健字子強進賢人天啟舉人

臣等謹案是書凡十篇篇有標目皆題曰內篇據其第微序所稱則尚有外篇也

張復爨下語二卷

復字子遠休寧人

臣等謹案是書每條俱以偶語聯比成文頗似格言而多雜以委巷之語

姚張斌尚綱小語三卷

張斌號尚綱亦號綱生金谿人天啟進士

陳其德垂訓樸語一卷

其德字太華桐鄉人

臣等謹案其德自序稱苜蓿多年當是曾為學官
是書皆勸善格言附以遺詩十首

陳繼儒狂夫之言三卷續狂夫之言二卷 安得長者

言一卷

繼儒見史類

楊觀光睿養圖說

無卷數

觀光招遠人崇禎進士官至少詹事

臣等謹案是書乃觀光為贊善時所進以唐六典載東宮官制贊善掌善掌侍從翼養之事故以睿養之道演為三圖一曰養性圖二曰養氣圖三曰養體圖每圖各係以說

毛元淳尋樂編一卷

欽定四庫全書

欽定續文獻通考

卷一百七十六

三

元淳字還樸一字嬰中松陽人崇禎時歲貢生

董漢策補計然子一卷

漢策字偉儒烏程人

臣等謹案是書成于崇禎壬子雜取左國吳越春秋諸書為之凡四十篇又叙畧一篇大旨以勾踐之復伯起衰激急事在人自為之自云釋憤之作是也

沈大洽蔬齋匪語四卷

大洽號愚公又號雲樵杭州人

賀貽孫激書

無卷數

貽孫見經類

王化隆真如子醒言九卷

化隆自號真如子廣漢人由貢生官主簿

臣等謹案是書分九篇文頗博麗閎肆規仿淮南

子

魏大成養生弗佛二論一卷

大成字時夫栢鄉人

聽心齋客問一卷

舊題廬山人萬尚父撰履貫無攷

文園漫語一卷

舊題程希堯撰里貫無考

王清一化書新聲無卷數

自序稱先天風雷侍者又有大衆推充都管云云蓋

道士也

臣等謹案是書取譚峭化書按節分章各為註釋
枕流日劄一卷

不著撰人名氏

臣等謹案明季心學盛行末流之弊淪于異說西
人慧點因撫佛經而變幻之或兼剽儒家道家之
詞而又舉所謂三教者全排之夸詐乖謬實為異
端之尤惟其推測天文製作器用亦有專長無不
可取

聖朝節錄其技能而禁傳其學術具存深意歐羅巴人所撰各書如利瑪竇辨學遺牘之類其大旨皆以闡發彼教茲不附錄于雜學類者以其為

功令所禁即當屏之經籍外云

以上雜學

宋

黃伯思東觀餘論二卷

伯思字長睿號霄賓又自號雲林子昭武人政和中

官至秘書郎

趙叔問肯綮錄一卷

叔問自號西隱老人魏王廷美之裔

朱翌猗覺寮雜記二卷

翌字新仲號瀟山居士舒州人政和中登進士第南

渡後官中書舍人

張湔雲谷雜記四卷

湔見史類

姚寬西溪叢語三卷

寬字令威嵊縣人仕至權尚書戶部員外郎樞密院

編修官

王觀國學林十卷

觀國字用賓長沙人紹興時官左承務郎知汀州寧

化縣

高似孫緯畧十二卷

似孫見史類

袁文甕牖閒評八卷

文字質甫鄞人燮之父

龔頤正芥隱筆記一卷

頤正字養正處州遂昌人光宗時為國史院檢討官

孫奕示兒編二十三卷

奕字季昭號履齋廬陵人寧宗時嘗官侍從

劉昌詩蘆浦筆記十卷

昌詩字興伯江西清江人寧宗進士嘉定間嘗為縣

今

王楸野客叢書三十卷附野老記聞一卷

楸字勉夫長洲人養母不仕惟杜門著述當時稱為
講書君

邢凱坦齋通編一卷

凱爵里無攷

葉大慶考古質疑六卷

大慶字榮甫以詞賦知名嘗官建州學教授

魏了翁經外雜抄二卷

古今考一卷

正朔考一卷

讀書雜抄二卷

了翁見經類

陳叔方穎川小語二卷

臣等謹案是書散見永樂大典中但題為陳叔方

撰攷宋時有陳昉字叔方號節齋温州平陽人累

官吏部尚書端明殿學士謚清惠又元時有隱士

陳植亦字叔方今攷是書無一語及元事當是陳

昉無疑

趙與峕賓退錄十卷

與峕字行之藝祖七世孫也官麗水丞

史繩祖學齋佔畢四卷

繩祖字慶長眉山入受業于魏了翁之門官朝請大

夫直煥章閣

趙升朝野類要五卷

升字向辰仕履無攷

王應麟困學紀聞二十卷

應麟見經類

羅壁識遺十卷

壁字子蒼號默耕新安人

愛日齋叢抄五卷

臣等謹案是書據陶宗儀說鄂題宋葉某撰名字
無攷

元

方回續古今考三十七卷

回字萬里號虛谷宋末知嚴州入元為建德路總管

臣等謹案是書蓋續魏了翁之古今考也了翁書

見前

黃潛日損齋筆記一卷

潛字晉卿金華人延祐進士歷官翰林侍講學士中

奉大夫知制誥同修國史同知經筵事謚文獻

明

楊慎丹鉛餘錄十七卷續錄十二卷摘錄十三卷摠錄
二十七卷

慎見經類

周洪謨篋齋讀書錄二卷

洪謨見史類

陳霆兩山墨談十八卷

霆見史類

朱承爵灼薪劇談二卷

承爵字子儋里貫無考

趙鉞古今原始十四卷

鉞字子舉一字鼎卿桐城人嘉靖進士官至右僉都

御史巡撫貴州

林有望史綱疑辨四卷

有望字未軒桐城人嘉靖進士官至四川按察司僉

事

陳錫千古辨疑七卷

錫字南衡天台人嘉靖進士官至禮部員外郎

王世懋讀史訂疑一卷

世懋見史類

臣等謹案是編乃其攷證之文雖以讀史訂疑為名而所言不必皆史事如鴻臚澗毗山龍魚水則糾明一統志疎漏鍾離令嫁前令女事則論自警編之失至于玉蘭花一條直農家圃史中語於史益為無涉蓋本筆記之流而強立讀史之目者也

黃溥簡籍遺聞二卷

溥鄞縣人仕履無攷

周夢暘常談考誤四卷

夢暘見史類

張鼎思瑯琊曼衍四卷

鼎思字慎吾安陽人萬厯進士

鄭明選批言四卷

明選字侯升歸安人萬厯進士官至南京刑科給事

中

王宇升庵新語四卷

宇字永啓閩縣人萬厯進士官至山東提學參議是編抄撮丹鉛諸錄之什一故曰升庵新語

陳耀文正楊四卷 學林就正四卷

耀文見經類

臣等謹案正楊凡一百五十條皆糾揚慎之譌其

學林就正則聚諸駁雜異說詆訶聖賢乖刺處正

復不少也

張萱疑耀七卷

萱廣東人官戶部郎中

王一槐玉唾壺二卷

一槐錢塘人萬歷末官臨淄縣知縣

錢希言戲瑕二卷

希言字簡棲吳縣諸生

陳懋仁析醒漫錄六卷

懋仁見史類

鄧伯羔藝穀三卷穀補一卷

伯羔見經類

徐勣筆精八卷

勣見史類

張存紳雅俗稽言四十卷

存紳字叔行號見其華容人天啟中由貢生官蒲圻

縣訓導

陳良儒讀書考定三十卷

良儒字穉修湖北人崇禎中由廕生官光祿寺典簿

方以智通雅五十二卷

以智見道家類

周嬰卮林十一卷

嬰字方叔莆田人崇禎十四年以貢入京特授上猶

知縣

胡燠拾遺錄

無卷
數

曠字闇翁南昌人

周祈名義考十二卷

祈蘄州人

呂毖事物初略三十四卷

毖字貞九吳縣人

俗語一卷

不著撰人名氏


緯略類編三十五卷

不著撰人名氏

稗乘四卷

不著編輯者名氏

以上雜攷



欽定續文獻通考卷一百七十六